

amen dico vobis, quia non est servus major domino suo, nec apostolus major eo qui misit illum. Si haec scitis, beati estis si feceritis ea (Joan. XIII, 5-5; 12,17). Considerate ergo, fratres dilectissimi, cuius infelicitatis, cuius insaniae sit, ut dedignetur servus conservo, discipulus condiscipulo pedes lavare; quando omnium Dominus et magister servorum et discipulorum pedes lavare dignatus est. Ille se humiliavit inferioribus; nos vero humiliari dignamur aequalibus et saepe melioribus. Quod non aliunde, quam de incredulitate evenit futurorum. Si enim vere est toto animo crederemus, per haec Domini præcepta, quæ brevi vitæ nostræ tempore custodimus, ad æterna et cœlestia nos præmia pervenire; non solum non erubesceremus omnia opera humilitatis implendo, verum etiam gloriaremur.

Commendate ergo firmiter memorie vestræ quod audistis a nobis, et quod nobis, imo Domino promisistiſ (a): nec ulla unquam tribulatio præsentis vitæ recordationem vobis vestræ auferat sponsionis. Implete omnia quæ audistis imperia: implete omnia vestra quæ promisistiſ. Nolite similes effici populo Iudeorum, qui cum audissent præcepta Dei, recte quidem dixerunt, *Omnia quæ mandavit nobis Dominus, audiemus, et faciemus ea;* sed quod bene promiserant, neglexerunt. Placuerunt enim Deo, quando se mandata ejus servaturos promiserant. Sic quidem legimus dixisse ad Moysen populum Israël: *Accedete, tu, et audi omnia quanta loquitur Dominus Deus noster ad te, et tu loqueris ad nos. Omnia quanta loquitur ad*

(a) Promissam in Baptismo pedum lotionem legimus in Appendix tomī 5, serm. 168, n. 5, et 237, n. 2.

*nos Dominus Deus noster, et audiemus, et faciemus. Et dixit ad Moysen Dominus, Audivi vocem sermonum populi hujus quanta locuti sunt. Quis dabit cor eorum sic esse in eis, ita ut metuant me, et observent præcepta mea omnibus diebus (Deut. v, 27-29)? Placuerunt ergo, ut diximus, Dco., quando quidem polliciti sunt se mandata ejus esse facturos: sed displicerunt, quando quidem posita sibi mandata, et quæ promiserant servare, transgressi sunt. De ipsis enim propheta loquitur dicens, *Dilexerunt eum in ore suo; et lingua sua mentiti sunt ei (Psal. LXVII, 36).* Hoc est enim ore Deum et non corde diligere, quod promittunt se Dei voluntatem esse facturos, mentiuntur lingua sua, et ad faciendam diaboli refugunt voluntatem, omnipotentem Deum ad iracundiam provocantes, qui se irrideri non patitur. Qui cum et opera hominum quamlibet in occulto facta conspiciat, qui cum verba omnia quamlibet secreto insusurrantes audiat, qui cum omnes omnium cogitationes intelligat et agnoscat, severissime judicabit. Qui hic ideo non semper contemptores suos punit, quia in futuro decrevit esse judicium, ubi æterna condemnatio et perpetua servatur peccantibus poena. *Ibi erit fletus oculorum, et stridor dentium.* Ubi, sicut ipse Dominus ait: *Vermis eorum non morietur, et ignis eorum non extinguetur (Isai. LXVI, 24).* Vos autem, fratres dilectissimi, credimus in nomine Domini, quod non transitorie audiatis verba nostra, imo divina: quia quod vobis dicimus, ex sanctis et divinis eloquiis mutuamur. Speramus in Domino, quod facietis omnia quæ promisistiſ, Deo adjuvante vos in sanctis operibus, ipsius Domini nostri Jesu Christi gratia; cui est gloria et honor cum Patre et Spiritu sancto in sæcula sæculorum. Amen.*

TRACTATUS DE CREATIONE PRIMI HOMINIS.

Apud Ambrosium inscribitur, *De dignitate primi hominis.* Apud Alcuinum autem, *Dicta beati Albini Levitæ super illud Geneseos: « Faciamus hominem ad imaginem et similitudinem nostram. »* Paulinus, Aquilensis supra lib. de Salutaribus Documentis, capp. 2 et 5, nonnulla mutuatus est ex hoc ipso tractatu; qui præterea in libro de Spiritu et Anima, cap. 55, totus insertus est. Hic itaque prima et postrema verba dedisce sufficiat.



Tanta dignitas humanæ conditionis esse dignoscitur, ut non solum jubentis sermone, ut alia sex diērum opéra, sed consilio sanctæ Trinitatis et opera majestatis divinæ creatus sit homo..... (a) Quapropter quisque diligentius attendat primæ sue conditionis excellentiam, et venerandam sanctæ Trinitatis in se ipso imaginem agnoscat, honoremque simi-

(a) Omissa repete ex libro de Spiritu et anima.

litudinis divinæ, ad quam creatus est, nobilitate morum, exercitio virtutum, dignitate meritorum habere contendat: ut quando apparuerit qualis sit, tunc similis illi appareat, qui se mirabiliter ad suam similitudinem in primo Adam condidit, mirabilius in secundo reformavit.

SERMO DE VANITATE SÆCULI.

Habetur supra, in Eligii tractatu de Rectitudine catholicæ conversationis, nn. 21, 22 et 23, præter versus circiter decem in fine ab istis verbis, *Benedicamus igitur Dominum, etc.*

In hac vita positi, fratres, ita agite, ut cum hinc migraveritis, et caro vestra a vermis operibus cœperit devorari in sepulcro, anima ornata bonis operibus cum sanctis omnibus lætetur in cœlis. Retrahatur vos a malis operibus vel peccatis, interitus eorum quos promisistiſ..... (a) Et erit tunc quanto quis amplius alio hic obediens Deo fuit, tanto ampliore illuc mercedem accipiet: quantoque hic amplius Deum amavit, tanto propius eum videbit. Benedicamus igitur Dominum Deum nostrum, fratres, qui ad lætitiam spiritualem congregavit nos. Simus in humilitate

cordis semper, et gaudium nostrum penes ipsum sit. Non de prosperitate aliqua hujus sæculi inflameremus; sed noverimus felicitatem nostram non esse nisi cum ista transierint. Modo gaudium nostrum, fratres, in spe futura sit, totum desiderium vita æterna sit, omnia suspiria nostra Christo anhelent. Ille unus pulcherimus, qui fœdos dilexit: ut pulchros faceret, desideretur: ad illum unum curratur, illi ingemiscatur; et dicant semper, *Magnificetur Dominus, qui volunt pacem servi ejus (Psal. XXXIV, 27).*

(b) Omissa repete ex Eligii tractatu de Rectitudine catholicæ conversationis.